

狂夫酒語目錄

上卷

長樂公傳

酒賦

酒銘

醉銘

君不見

和李賀勸酒歌

和白居易詩酒琴人多薄命予酷好三事

勸酒四言

和嵇康酒會詩

和張說對酒

和庾亮就蒲州使君

乞酒

和庾亮荅王司馬餉酒

和庾亮奉荅賜酒 和庾亮奉荅賜鵞酒

和庾亮衛王贈桑落酒奉荅

和庾亮聘齊秋晚館中飲酒

和庾亮正旦蒙賚酒

和庾亮蒲州刺史中山公乞酒一車未送

和庾亮蒙賜酒 和陸機當置酒

和劉駕醒後 對酒四首

對酒讀五柳詩 勸酒七言古詩四首

野人醉歌

下卷

和王灣同賀監林月清酌二首

和杜甫陪王侍御宴通泉東山野亭

和杜甫崔駙馬山亭宴集

和陳叔達後渚置酒

和高正臣晦日置酒林亭

和郎士元宴張舍人宅

和包佶對酒贈故人

和駱賓王詠雲酒 和白居易對酒

醉中荅友

對酒

尊前憶友

對酒遣懷

飲後夜醒

醉後口占

歌酒

與友對酒吟詩

樂酒

勸酒

中酒

空腹蚤酌

晚醉

索酒吳伯度

和牟融秋夜醉歸有感而賦

和張說醉中作

和孟浩然醉後贈馬四

和李崇嗣獨愁詩

和于武陵勸酒

醉後

和李太白客中行

和岑參醉戲竇子美人

和岑參酒泉太守席上醉後作

和岑參戲問花門酒家翁

和王昌齡龍標野宴

和王昌齡李倉曹宅夜飲

和李商隱花下醉

和唐劉商醉後口號

和白居易同李十一醉憶元九

和韓子蒼謝信守連鵬舉送酒

和陳無已席上勸酒

和元禎十二醉 和陸機飲樂

和郎士元寄李袁州桑落酒

狂夫酒語目錄終

狂夫酒語卷之上

嘉禾梅顛道人周履靖著

金陵荆山書林梓行

長樂公傳

先生姓甘名醴字醇甫宜城新豐人也生於上古不求人知樂與天喬者並秀於原野始見知於神農氏棄爲見時卽大愛幸及爲農官遂薦之與叅氏梁氏並登於朝後值歲祲黎民阻飢遂逃於河濱獲遇儀狄得配麴氏然素性和柔

遇事不能自立必待人斟酌而後行嘗自道曰
沽之哉沽之哉我待賈者也後寓杜康先生家
得禁方去浮粕存精華數千年間長生久視與
時浮沉名氏不可得而詳云時時藏修於葦門
甕牖之中而歛灑之光醇濃之味聞之者慕見
之者愛常不言而飲人以和故雖一惡於禹王
再斥於周武而先生亦自若也韜居隱諱守口
如瓶帝乙嫡子知之及卽位日夕與妲己以先
生爲樂鑿池以居之作堤十里以捍之封爲蘄

侯晉以公爵食祿千鍾凡大祭祀大會同皆以
先生爲可人登之座右而好合之至於孔子之
聖亦不見遺於鄉人之會嘗因子貢以蜡祭之
人爲若狂而病其責人之無已此正所謂武叔
之不知量也後值漢高帝出始藉先生之力斬
白蛇以成帝業繼因羣臣拔劍擊柱反歸過於
先生遂革其爵降爲青州從事漢亡魏徐邈以
先生爲聖人終日相與陶陶不治事卒以此見
訾讐後典午氏興先生益重於時阮步兵尤如

先生移官舍就相款啓謝安石東山之遊登高
臨遠無日不先生在口也惟劉伶土木形骸素
善病每訪先生於野令平頭荷鍾隨之爲生死
交至於唐宗丹霄之會宋祖兵權之釋雖庖人
饗人並列於前必以先生爲稱首間生女一曰
麻姑歸江西建昌氏性頗嚴重人不敢于以私
見之者歌曰南有喬木不可休息漢有遊女不
可求思蓋貴之也男二長曰無量居士少好服
食咽氣嘗隱于襄陵太原間時與高人羽客促

膝譚讌卽踞地耳熱而呼嗚嗚後益厭世謝客
僑居成都多結廬深林大壑中冬月積薪自溫
其出常以桑落爲候最後從呂道士于岳陽樓
授神仙煉形秘術騎黃鶴衝天而去次日醴卿
束髮受書多個儻大畧始仕于開元間爲章丘
令察廉遷高郵守又徙池州淮安皆有殊尤茂
績所至自王公貴人下至閭巷士庶譽之不容
口謂公爲政如醇醪藹然薰人而其清心凜冽
如玉映冰壺久之治行益起授薊州牧時天子

好祥瑞公上河清頌稱旨賜金魚紫袋封潞州
郡開國公降官女五人其名蓮花者最爲公愛
幸由是惑溺令恣日酣歌沉湎政事滯廢格爲
監史所彈至詆公爲狂藥奪爵徙蒲州安置公
愈落魄自故被羊羔裘持長柄葫蘆與蓮花樂
以忘死其後子孫繁衍派遠流長不可以地拘
之人無貴賤事無小大皆不能外之以爲侶也
然先生雖自謂善交亦不能徹底始如奉高汎
濫之器清而可涴終則不免卓茂之行已在於

清濁之間矣故人亦不滿於先生先生曰君子
之交淡若水若久耽於此且不逮穆生遠甚遂
去之或曰醉鄉或曰糟丘竟不知其所終後有
梅塢居士聞先生而慕之遂抽秘思揮毫素撇
鬚而贊之

贊曰

粵惟儀狄

厥裔是由

元祀洽比

宴御孔調

嗟彼狡者

過而及亂

敬告良糾

無使心寃

酒賦

醇郁既釀剖自狄康玄纁玉帛禘祀蒸嘗藉之
成禮芬苾皇皇孝養父母胥慶一堂晉謁佳賓
式譽且臧投石超距敵慨稱強爽蕭湛露周家
孚有道之光廢業斷飲邠原爲東漢之良綿絮
而間以雞黍斯享而加以羔羊職思其外蟋蟀
在堂樂只君子南山有桑令儀令德實美名揚
方其有大朝會也或肆之筵或授之几籩豆有
楚肴核堆旅既立之監或佐之史一人當陽敬

而無失濟濟臣工莫不今德方嘉其式禮之莫
愆奚至於浮鍾而舉白及其大祭祀也八音合
奏鼓瑟吹笙百禮既至有壬有林親而子姓疎
而外賓酌言獻之終事欽欽酌言酬之和樂欣
欣是謂宿咤乎康爵誠無愧於禴祭之西隣是
茲雅誼規圓矩方遐思先哲曰篤不忘三王以
降炎漢李唐六朝五季趙宋元堯悠悠終日滔
滔醉鄉靡明靡晦石計斗量壺開玉液瓶瀉椒
芳樽盈縹玉爵泛金漿人亦有言世變江河暢

飲高歌俟河之清人壽幾何如會瓦石職競作
羅我儀圖之是知其一莫知其他人之齊聖適
口微醲彼昏不知日夕歡娛總而計之不越兩
途蕭曹以後賢相陳平傲傲終日呂滅炎興王
魏以下諫垣楊城陶陶樂飲止相延齡雖醉猶
愈於不醉乃名聞宮禁之石曼卿坐飲而不同
於飲班伯謹言紆踞姐已之圍屏陶徵士之籬
菊王逸少之蘭亭過沛而歌猛士漢高以創業
而兼守成慶善而懲敬德唐宗身宴樂而志精

明趙整以斯而作戒劉章緣是而成名雖其醇
疵之不一難逃乎月旦之評然其不至於縱樂
亦庶乎君子之爭至若迷心鳩毒醉眼昏花腐
腸忘戒適口詡誇竹林之阮籍高陽之博徒畢
卓之盜甕知章之鏡湖夏王之糟堤十里文君
之春日當壚當盛夏而觴河朔非元旦而飲屠
蘇爲伯有之窟室失祖珽之金羅借言於千鍾
之堯帝藉口於孔聖之百瓠非言非由式號式
呼溺志於醇濃之爽口曾不知歲月之幾何甘

心於三爵之不識焉能爲世道之有無此其下
焉者乎於乎得失之跡成敗之由昭然史冊不
相爲謀君子得之以適情成禮小人由之以欲
恚憂沉酗敗亂相爲敵讐彼交匪敖萬福來求
若小體而害大洵少樂而湛憂碎兕觥之飲器
絕旨酒之思柔想獨醒之屈子思悔過之衛侯
永作稽於中德以景仰乎前修

酒銘

儀狄剗始惟斯作玼酒星宿列酒泉郡稱宜城

玉液蒼梧縹清麻姑桑落醪醖更名春醪夏熟
秋甯冬斟異香滿室綠蟻浮罇蓮花比白竹葉
並青惠水冷冽醴泉幽馨上郊昊天下祀社靈
幽冥歆嚮歡宴主賓王孫俠客共醉芳春酌酒
成禮彝倫攸欽旣能遣興復可陶真飛觴快思
五盞通神三杯壯志百壺可傾解舒抑鬱淨掃
塵氛千愁頓釋萬慮頃分宜於客邸暢以良辰
月下舒抱花底適情周書苾酒二卣公禋曲江
子美逸少蘭亭畢卓臥齋荷鍾劉伶騎驢太白

有方酒詩 卷一
當壚文君向王嵇阮共酣竹林賞馳壘竿曷憂
困貧醉鄉出入壽益身輕生無他嗜喜於蒲斟
一吸五斗欲醉十罌酒仙之侶山澤逸民樂茲
真味叙以酒銘

醉銘

病分四百方載千名能於治症艱以療醒梅稍
落月帳底殘更房櫳顛倒牕牖霾昏耳邊蟬韻
滿目浮雲不知朝夕何懼雷霆倦疲四體沉迷
英蒐欲言難問有夢無成須臾憂患繁滋中心

無能安寢厭聽雞聲嬌姬俊妾枕簟忘情阮公
連醉胡敢同矜志學屈子衆醉獨醒前歡以失
往事空矜擒伶之伍我期並臨馘卓之伴亦欲
偕行展眠徒倚旣屈復伸欹枕就穩牽幃求陰
淒涼之境寂寞之因喉如野燎肌熱猶焚愁同
平子渴似曹軍巾袂弗禦芳筵虛陳海錯熊掌
豹胎猩唇周顛菘菜庾公薤辛茂世紫螯張翰
青萼歐川桂蠹頴谷榆仁全不知味何由辯玃
頻呼煮茗欲潤燥咽倦梳雙鬢懶整冠襟強荅

書札潦倒迎賓誠堪一咲亦覺傷神深宜節飲
乃可延齡宜城之碧鄴湖之清頓顏痿肺腐腸
憊形前車旣覆後乘斯驚俠客恒遇稚子奚聞
狂夫親歷聊成醉銘

君不見

君不見畢吏部左手持螯右持酒又不見陶荆
州日日運甕臨齋頭人生得意貴行樂何用勞
勞空自謀鏡中朱顏昔日妍今來憔悴霜滿顛
麟閣功勳有誰在鳳樓歌舞向誰傳春光徒自
媚秋月空自圓有酒不能飲經營萬井田田家
辛苦心計拙歌兒不蓄蓄牧奴一朝黃土覆君
面蕭疎林木啼哀鳥君不見日西徂

和李賀勸酒歌

遇花對月且飲酒莫向君平卜其壽芳春倏忽
秋風生不見名花見衰柳人生處世渾如逆旅
客日日風波君不識怒濤萬丈頃刻間漂零那
管千年澤巧機妙策誰挽得何如慷慨浮太白
貧富榮枯無百年堪哂愚夫日哂哂

原韻

零落恓惶一杯酒主人奉觴客長壽主父西游
困不歸家人折斷門前柳吾聞馬周昔作新豐
客天荒地老人不識空將牋上兩行書直犯龍
顏請恩澤我有迷魂招不得雄雞一聲天下白
少年心事當拏雲誰念幽寒坐鳴呃

和白居易詩酒琴人多薄命予酷好三事
性癖琴詩無別嗜生平縱飲受艱辛鳴琴月下
忘神倦潦倒花前豈畏貧三尺焦桐涵素抱一

尊玉液遣閒身湯宗李杜題中奧賡和幽情迥
俗塵雅調可能祛萬慮村醪聊可醉芳春我儕
日日耽於此放浪形骸傲世人

原韻

愛琴愛酒愛詩客多賤多窮多苦辛中散步兵
終不貴孟郊張籍過於貧一之已嘆關於命三
者何堪併在身只合飄零隨草木誰教凌厲出
風塵榮名厚祿二千石樂飲閒遊三十春可得
無厭時咄咄猶言薄命不如人

勸酒四言四首

幽窓之下有詩有琴一彈一咏樂我天真寡嗜
無契惟喜蒲斟醉觀蝶栩寤聽鳴禽

其二

旨酒在手明月在床褰帷獨酌身世兩忘珮趨
玉闕何如醉鄉賢愚同盡嗟彼北邙

其三

忽憶芳春與酒相親黃鶯爲友絳桃爲隣俄然
轉眼花落成茵時光易邁寒暑催人

其四

腴田千頃何如一杯清秋翫菊春隴觀梅日月
如矢旦暮相催君能意度萬事俱灰

和嵇康酒會詩

徐步芳圃中窮覽歡無已綠柳間紅桃李白花
叢時方池泛藻萍潑潑跳赤鯉馴鶴啄松根頑
童釣鱸鮪狂歌與浮白叔夜共其執綠水曲聲
清旨酒堪漱齒席地罄芳樽長嘯風前起此興
有誰同不堪語俗子世間榮達人未必終其始

吾當察玄微杯酒樂無已

原韻

樂哉苑中遊周覽無窮已百卉吐芳華崇基邈
高峙林木紛交錯玄池戲魴鯉輕丸斃翔禽織
綸出鱸鮪坐中發美譚異氣同音軌臨川獻清
醑微歌發皓齒素琴揮雅操清聲隨風起斯會
豈不樂恨無東野子酒中念幽人守故彌終始
但當體七絃寄心在知已

和張說對酒

不罄杯中物空餘百鎰金園花虛發樹山鳥自
啼林逝水何能返春回弗易尋已知名利遠凭
石坐濃陰且盡良辰興情高不厭深頽然成一
醉滌却俗塵心

原韻

畱侯封萬戶園令壽千金本爲成王業初由賦
上林繁華安足恃霜露遞相尋鳥哭楚山外猿
啼湘水陰夢中城闕近天畔海雲深空對忘憂
酒離愁不去心

和庾亮就蒲州使君乞酒

雪飄千嶺玉風撼使人愁鳥雀寒難息飛泉凍
不流俚詞乞故友佳釀熟新秋堪羨庾公興情
高似隱侯

原韻

蕭瑟風聲慘蒼茫雪貌愁鳥寒棲不定池凝聚
未流蒲城桑落熟霸岸菊花秋願持河朔飲分
勸東陵侯

和庾亮荅王司馬餉酒

眷戀故人意樽貽琥珀紅歡顏傾碧斝雅興對
清風還堪酣阮籍不及醉王戎共酌空庭裏蟾
光映酒中

原韻

今日小園中桃花數樹紅開君一壺酒細雨三
春風未能浮畢卓猶足舞王戎仙人一捧露拚
不及杯中

和庾亮奉荅賜酒

金波仙子贈酌我足生平把盞情還暢開樽思

欲驚狂飈林外吼雜霰牖間鳴醉臥重幃裏毋
勞問寒榮

原韻

仙童下赤城仙酒餉王平野人相就飲山鳥一
羣驚細雪翻沙下寒風戰鼓鳴此時逢一醉應
枯及更榮

和庾亮奉荅賜鷲酒

感爾餽鷲酒開尊愜我心籬畔花初綻天邊日
欲沉酒縱生羣樂情閒抵萬金一詩堪擬謝醉

我在山林

原韻

雲光偏亂眼風聲特噤心冷猿披雪嘯寒魚抱
凍沉今朝一壺酒寔是勝千金負恩無以謝唯
知就竹林

和庾亮衛王贈桑落酒奉荅

貽酒故人意杯中泛紫霞興狂歌白雪情逸對
黃花繁蓼開寒渚閒鷗集晚沙陶然壺欲罄歸
去步欹斜

原韻

稔人坐狹斜喜得送流霞
豈窓催酒熟停杯待
菊花霜風亂飄葉寒水細
澄沙高陽今日晚應
有接離斜

和庾亮聘齊秋晚館中飲酒

籬綻淵明菊詩成杜甫才
深秋却統扇良夜倒
金杯坐久風生榻歌殘月
滿臺從教玉漏促浮
白且徘徊

原韻

忻茲河朔飲對此洛陽才
殘秋欲屏扇餘菊尚
浮杯漳流鳴二水日色下
三臺無因侍清夜同
此月徘徊

和庾亮正旦蒙賚酒

新歲開家宴兒童捧玉杯
屠蘇清更冽楊柳綠
初迴簫鼓尊前奏梅花枝
上開隣翁稱賀節歡
咲入扉來

原韻

正旦辟惡酒新年長命杯
柏葉隨銘至椒花逐

頌回流星向碗落浮蟻對春開成都已救火蜀
使何時來

和庾亮蒲州刺史中山公許乞酒一車未

送

明月滿花臺蒲州信不廻未貽玉液至寧得好
懷開山堂候使下鴈足寄書催千日徒云醉中
山何得來

原韻

細柳望蒲臺長河始一廻秋葉幾過落春蟻未

曾開瑩角非難馭槌輪稍可催只言千日飲舊
逐中山來

和庾亮蒙賜酒

瓊漿降玉臺春色遍蒿萊稚子歡迎賜騷人捧
玉杯黃花籬畔綻綠蟻甕中開叔夜慙勤勸山
濤倒屣來尊前共罄興酪酏倒高臺

原韻

金膏下帝臺玉曆在蓬萊仙人一遇飲分得兩
三杯忽聞桑葉落正值菊花開阮籍披衣進王

我舍咲來從今覽仙樂不假向瑤臺

和陸機當置酒

興欲延酒人置酒玄都觀柳條垂幾千桃花開
一半狂蜂枝上忙浪蝶風前亂縱酒學陶潛登
樓賦王粲

原韻

置酒宴佳賓瞻眺臨飛觀絕嶺隔丈餘長嶼橫
江半日色花上綺風光水中亂三益旣葳蕤四
始方葱粲

和劉駕醒後

共客對芳尊不覺至更後模糊倒花下席間人
散久醒後興未頽復傾杯持手

原韻

醉臥芳草間酒醒日落後壺觴半傾覆客去應
已久不記折花時何得花在手

對酒四首

狂來俠氣濃把酒對芳叢未飲心先暢三杯俗
慮空思豪歌白雪醉去臥春風爲語長安客浮

生似轉蓬

其二

柳陌鶯聲脆花溪浪蝶飛
當憐佳麗日莫負景
芳菲淑氣侵詩骨
暄風拂翠微
攜壺偕酒伴不
醉肯言歸

其三

不對花間釀空爲落魄人
還宜傾數斗應惜洛
陽春擾擾無窮事
須知有限身
請看塵世上更
換幾番新

其四

衰老豈復少黃河無迴波
富貴終有易百歲能
幾何不如飲美酒撫掌
且高歌君看北邙土
纍纍荒塚多

對酒讀五柳詩

一樽桑落酒兩卷五柳詩
一酌歌一詩五內俱
怡怡此時有真樂世人
何能知得解詩中味
陶公我可師

勸酒七言古詩二首

踏春郊外拖雙屐古塚幾堆少人跡叢叢荆棘
混蒿萊哀鳥夜夜啼松柏黃土惟留衰草痕下
有偉績英雄客精靈千載在何方蒼苔剝蝕姓
名石聲華今古總成空不如飲酒爲上策

其二

幾樹桃花間柳枝參差紅綠映隋堤輕盈飛燕
呈嬌舞趙飛燕美麗文君勸酒卮拂拂香風飄錦
袖溶溶明月照蛾眉猖狂金谷園中樂酪酊花
間枕習池婆娑俠客歌新詞落魄騷人倒接羅

寄語風流年少客問誰能訂百年期殷勤且罄
杯中物須信人生有別離

野人醉歌

慢啓牀頭綠醕樽翛然獨對意還真枝頭鳥語
爲簫管庭畔花開總是春持竿從容情思俠傾
壺已覺氣氤氳三杯未盡踈狂興五斗風騷難
具陳且向風前歌一曲懶評朝內有絲綸長安
多少利名者不及壚頭縱酒人狂來長嘯天風
起醉後模糊草作茵何用細論今古事頻將旨

卷之九
一
酒醉閒身醜醜不識天和地造次高吟若有神
此樂世間知更寡試將幽思與君聞



狂夫酒語卷之下

嘉禾梅顛道人周履靖著

金陵荆山書林梓行

和王灣同賀監林月清酌二首

玉鑑懸霄漢清光萬里同當期騷客翫不與俗
人通如坐水晶裏似臨河朔中開尊歡共賞聯
句各稱雄

其二

月輪當戶朗翫賞許誰同幽興一宵集清光萬

里通風蟬鳴樹杪丹桂落杯中逸思尊前爽詩
才醉後雄

原韻

華月當秋滿朝英假興同淨林新霽入規院小
涼通碎影行筵裏搖花落酒中清宵凝爽意併
此助文雄

和杜甫陪王時御宴通泉東山野亭

野亭開宴賞客至日初斜駐馬看山色擎杯領
物華林花照澗水汀鷺集寒沙拚醉今宵月和

永睡爾家

原韻

江水東流去清尊日復斜異方同爾賞何處是
京華亭景臨山水村烟對浦沙狂歌遇形勝得
醉卽爲家

和杜甫崔駙馬山亭宴集

亭前花發樹池畔鶴梳毛曲水通湖入竒峰接
漢高新詩揮繭楮宿醞染羅袍宴賞陪蕭史還
當醉碧醪

原韻

蕭史幽栖地林間踏鳳毛
湫流何處入亂石閉門
高客醉揮金碗詩成得
錦袍清秋多宴會終日
因香醪

和陳叔達後渚置酒

蓬開當後渚四野起軍
輦晚色烟迷樹寒光月
映溪靜聽飛鴈嘑眺望
遠山低酒罄情無已俄
然聽曉雞

原韻

大渚初驚夜中流沸鼓
鼙寒沙滿曲浦夕霧上
耶谿岸廣鳧飛急雲深
鴈度低嚴關猶未遂此
夕待晨雞

和高正臣晦日置酒林亭

陽和隨氣轉南陌遍韶
華弱柳金垂岸芳梅玉
遶家林前風作陣牖外
雪飛花把盞虛亭裏陶
然醉日斜

原韻

正月符嘉節三春翫物
華忘懷寄樽酒陶性狎

山家柳翠含烟葉梅芳帶雪花光陰不相惜遲
遲落景斜

和郎士元宴張舍人宅

不臨河朔宴喜集華堂筵庭砌花迎日池塘水
接天金杯浮綠醕石鼎裊蒼烟此夕須傾倒醅
醕寶炬前

原韻

懶尋芳草徑來接待侍臣筵山色如殘雨墻陰覺
暮天鶯啼漢宮柳花隔杜陵烟地與東城接春

光醉目前

和包佶對酒贈故人

綠酒容人醉清霜帶菊開杯傾愁欲釋髮白老
將來待月情還愜經秋客未回好題新句慰情
怯不能裁

原韻

扶起籬披菊霜輕喜重開醉中驚老去咲裏覺
愁來月送人無盡風吹浪不回感時將有寄詩
思澀難裁

和駱賓王詠雲酒

色赤渾如珀清醇勝醴泉持螯傲吏部畱珮傲
神仙時滿牀頭甕何須杖上錢嵇康喜得醉興
至咏長篇

原韻

朔空曾紀曆帶地舊疏泉色泛臨碭瑞香流赴
蜀仙款交欣散玉洽友悅沉錢無復中山賞空
吟吳會篇

和白居易對酒

花柳酣情思艸杯動世憎自知酒更洽遇事一
無能清酌蔬爲饌黃昏月作燈任論非與是醉
後睡騰騰

原韻

莫上青雲去青雲足愛憎自賢誇智慧相糾鬪
功能魚爛緣吞餌蛾焦爲撲燈不如來飲酒任
性醉騰騰

醉中荅友

金柳藏黃鳥銀髯映綠樽嬌娥畱客醉老叟咏

歌喧幽砌芬蘭蕙明蟾滿竹軒莫言情思怯壯
歲興猶存

對酒

不究叅同契難憑鼎內砂且開竹裏席湯對石
邊花綠酒歌清曲紅顏映紫霞百年三萬日幾
度醉欹斜

尊前憶友

舉杯對孤月獨酌動相思螢火簾端燄蟬聲樹
杪竒三秋分別路兩載廢題詩此夕情寥寂尊

前憶爾時

對酒遣懷

五十髮未雪歡娛勝少時看花忘去遠沽酒較
來遲詩賦情還廣巖居志不卑百年知有限何
必蹙雙眉

飲後夜醒

飲罷客歸程登樓步履傾枕邊和酒睡簷畔月
初明強起傍窓倚高呼索茗烹盤桓猶未已忽
聽曉雞聲

醉後口占

笙歌滌塵耳杯酒逐閒愁
遇客應狂咲逢花須
滿頭憶傾元旦酒不覺報新秋
歲月忙奔走韶
光不肯畱

歌酒

生惟嗜旨酒遂與世情乖
賡咏增豪思開尊動
好懷淵明興更洽阮籍趣相諧
爛醉名花底何
妨倒石街

與友對酒吟詩

與君酌春酒對月醉吟詩
歲月如推轂人生似
奕棊林花爲故友谷鳥是相知
且盡尊前興毋
勞身後思

樂酒

豈羨人間利與名尊壘聊可寄
餘生興來拉客
花前飲樂至哦詩竹底行有酒
莫辭千日醉無
官猶喜一身輕醅醕不管塵中事
日上東窓未
解醒

勸酒

林巾潦倒一潛夫癖性年來思不孤樂志湯吟
詩百首怡情豪釐酒三壺晴春挈榼尋花柳秋
月携尊泛石湖對客湯歌成逸興謀生之計且
模糊

中酒

夜醉壺觴神思怯擁衾垂帳只堪眠耳邊彷彿
鳴簫管眼底模糊障霧烟夢去頻揮杯敬客醒
來急喚茗烹泉高陽俠客休沉酒聊寄餘情人
後聯

空腹蚤酌

李白高情草東招曉來風雪半空飄謾看郊甸
將盈尺且擁松爐可進瓢酒聖卯時先得樂山
人酉刻後無聊夢回孤枕天將曙宿酒侵晨尚
未消

晚醉

山妻相共話從容甕內新筍味正濃窓外俄驚
飄白雪樽前方喜煮青葙幾卷古詩吟杜甫三
杯濁酒酌周顛醉後却忘歸枕席見曹應是咲

龍鍾

索酒吳伯度

東吳公子度非常
高築園亭野水傍
與共賓朋浮綠蟻
閒看鷗鷺戲滄浪
塔前孤鶴翻清影
庭畔雙梅發異香
借問新篔簹幾甕
可傾五斗醉周郎

和牟融秋夜醉歸有感而賦

飲興歌狂頃夜闌
醉吟新句足成歡
歸來忽聽更聲促
睡去俄驚斗柄殘
帳底梅枝涵月影
牀

頭繡縹禦秋寒
夢回渾似相如渴
啜茗推窓天氣漫

原韻

啣杯誰道易更闌
沉醉歸來不自歡
懶飲後時孤劍冷
寂寥無寐一燈殘
竹窓涼雨鳴秋韻
江郭清砧搗夜寒
多少客懷消不得
臨風搔首浩漫漫

和張說醉中作

不識人知否
醉時勝醒時
模糊歌雅調
幽興紀

新詩

原韻

醉後無窮樂全勝未醉時動容皆是舞出語總成詩

和孟浩然醉後贈馬四

拙訥惟耽酒生平懶皺眉醉來眠石榻醒後月淪時

原韻

四海重然諾吾嘗聞白眉秦城遊俠客相得半

酣時

和李崇嗣獨愁詩

甕頭酒初熟不必向人求漫傾四五尊掃却此時愁

原韻

聞道成都酒無錢亦可求不知將幾斗消得此來愁

和于武陵勸酒

醅醲盈玉卮勸君君莫辭一夜風雨惡枝頭花

欲離

原韻

勸君金屈卮滿酌不須辭
花發東風雨人生足
別離

醉後

梅顛思更粗三盞卽高呼
問君能諒不度量有
江湖

和李太白客中行

甕頭酒熟十程香
甕面輕浮瀲灩光
不問主人

多少價鯨吞幾斗臥江鄉

原韻

蘭陵美酒鬱金香
玉碗盛來琥珀光
但使主人能醉客
不知何處是他鄉

和岑參醉戲寶子美人

丹唇皓齒宓妃殷
桃花幾朶掩雲鬟
座中喜有傾城色
我輩風流倒玉山

原韻

朱唇一點桃花殷
宿妝嬌羞偏髻鬟
細看只似

陽臺女醉看莫許歸巫山

和岑參酒泉太守席上醉後作

一飲五斗便起舞狂來琴瑟不能鼓今宵縱飲
暢詩腸那管空庭傾盆雨

原韻

酒泉太守能劍舞高堂置酒夜擊鼓胡笳一曲
斷人腸座上相看淚如雨

和岑參戲問花門酒家翁

狂夫終日耽於酒未到酉時杯到口鸚鵡不肯

典酒錢問翁貰酒肯也不

原韻

老人七十仍沽酒千壺百甕花門口道傍榆莢
仍似錢摘來沽酒君肯否

和王昌齡龍標聖宴

水畔幽亭納晚風翛然把盞對花叢莫愁塵世
無窮事掌上金卮不可空

原韻

沅溪夏晚足涼風春酒相携就竹叢莫道絃歌

愁遠謫青山明月不曾空

和王昌齡李倉曹宅夜飲

菘盤畱客共追歡
滿泛金甌却夜寒
情洽劇談忘漏永
臨窓對月醉中看

原韻

霜天畱後故情歡
銀燭金爐夜不寒
欲問吳江別來意
青山明月夢中看

和李商隱花下醉

花如錦繡酒如霞
痛飲從教斗柄斜
雞唱日高猶未散
朦朧醉眼看山花

原韻

尋芳不覺醉流霞
倚樹沉眠日已斜
客散酒醒深夜後
更村紅燭賞殘花

和唐劉商醉後口號二首

酒尊詩卷伴孤身
儋石無儲不謂貧
終日花前博一醉
任教塵世喚狂人

其二

梅花杯酒寄閒身
一任家如原憲貧
醉來欲跨

雲中鶴飛入蓬萊作散人

原韻

春月秋風老此身一瓢長醉任家貧
醒來還愛浮萍草漂寄官河不屬人

和白居易同李十一醉憶元九

詩能遣興醉忘愁縱飲何妨那用籌
屈指微之別去久也應此夕住梁州

原韻

花時同醉破春愁折取花枝當酒籌
詩忘憶故人

天際去計程今日到梁州

和韓子蒼謝信守連鵬舉送酒

雨遍長林生寂寞蕭齋獨坐欲持杯
故人憐我詩腸澁特遣山童送酒來

原韻

上饒藉甚文章守曾共紫薇花下杯
鈴閣晝閒思老病故教從事送春來

和陳無已席上勸酒

酒滿金尊詩思寬詩吟未就酒先乾
與如畢卓

狂如阮莫把時人一樣看

原韻

稍開襟抱使心寬
大放酒腸湏盡乾
珠簾十里城南道
肯作當年小杜看

和元禎十二醉

先醉

我儕空負五斗量
一壺未罄情欲昏
糊糗不辨天與地
弗脫荷衣臥薜蘿

獨醉

流鶯巧語梅花底
山人靜坐幽窓裏
開尊獨酌樂閒情
忽覺沉酒扶不起

宿醉

昨宵皓月滿長空
秦女擎杯興不窮
漏盡曲終情未徹
朝來猶自睡朦朧

懼醉

暮年漸覺四肢疲
遇酒空懷少壯時
但適幽情傾一尊
恐成酩酊損詩脾

羨醉

嘉賓共宴習家池興味還同昔阮裕佳釀吳姬
成四美花前傾倒却如泥

憶醉

洛陽歌舞花間醉屈指猥驚廿載奇
半狼藉溝前荒土使人悲

病醉

兼旬共客泛湖頭酒美賓嘉興更悠不覺放懷
傾數斗朝來委頓使人愁

擬醉

騷客分題索和賡高燒絳蠟坐深更興狂不覺
天將曙步履渾如宿酒醒

勸醉

花滿江城月滿樓尊中綠醕色如油逢歡不飲
誠堪惜光景何曾爲客畱

任醉

天爲羅帳草爲茵綠酒傾尊不厭頻拚取今朝
和月醉石頭欹枕臥閒身

同醉

有夫海一 卷下
芳春拉客探東郊柳浦流鶯花浦梢席地開尊
成宴賞共拚此夜倒蓬茅

狂醉

吳姬高唱白苧曲騷客頻傾碧玉杯一曲一歌
狂起舞淋漓羅袖倒花臺

和陸機歡樂

新篔一甕清醇與酒堪爲主賓興至兩袖起舞
醉來傍若無人

和郎士充寄李袁州桑落酒

味同桑落宿醞美勝甕頭新春應寄山中逸客
難貽世上俗人

原韻

色比瓊漿猶嫩香同甘露仍春十千提携一斗
遠送瀟湘故人



國家圖書館, NATIONAL CENTRAL LIBRARY, TAIWAN, R.O.C.

